

**Narsami illumik nutaaliorfimmik 300 m<sup>2</sup>-isut angissusilimmik pilersaarusiortoqarlunilu sanasoqarnissaanut Naalakkersuisut FLL17-imi aningaasaliinissamut peqquneqarnissaanut Inatsisartut aalajangiiffigisassaattut siunnersuut. Illumi nutaaliorfiusumi nutaaliortiternissap siuarsarneqarnera inuussutissarsiutigullu siuarsaneq sulissutigineqassapput, taakkunani ilaallutik takornariaqarnermi ingerlassat kiisalu sumiiffinni pissarititat aallaavigalugit tunisassiassanik inerisaaneq, tassa kujataani pisuussutit uumassusillit umaatsullu pigineqartut aallaavigalugit tunisassiornikkut imminut pilersorneq siuarsarneqarsinnaaqqullugu. Nutaaliorfiup ingerlanneqarnera Namminersorlutik Oqartussanit isumagineqassaaq.**

(Inatsisartunut ilaasortaq Aqqaluaq B. Egede, Inuit Ataqatigiit)

Qularutissaanngilaq nutaaliorneq pisariaqartikkatsigu. Taamaattumik siunnersuuteqartup siunnersuutimini siunertaa isumaqatigaara. Taamaakkaluartoq siunnersuutaasup saqqummiunneqarnermisut isikkoqartillugu siunnersuut itigartippara. Taasissutigineqartussaq pituttuivallaarpoq suliniutillu naleqqussarnissaanut periarfissiinani, allamik aaqqiissuteqarnikkut pitsaanerusemik naammassinnittoqarsinnaappat. Assersuutitut oqartoqarsinnaavoq, kina oqarami 300 kvadratmeterioqqissaarpat pitsaanerpaasoq, imaluunniit Narsameeqqissaarpat pitsaanerpaassasoq. Aamma isumaqatiginngilara iliuusissatut siunnersuut taamaallaat nunatta kujataani ineriartornermut tunngatinneqassappat.

Siunnersuut ataatsimiititaliamut innersuuppara imak oqaasertalerlugu:

Ajornanngila taasissutigineqartussaq naleqqussarnissamut periarfissaqarnerulersissallugu? Siunnersuutigaara paasiniarneqassasoq siunnersuutip siunertaa Inuilimit Narsameereersumit naammassineqarsinnaanersoq. Immaqa aamma siunnersuutip ilaa takornariaqarnermut tunngasoq sumiiffinni allani nammassineqarsinnaavoq. Immaqa Tasiilami takornariaqarnermi ingerlatsiviulluartumi ineriartortumilu suliniummik pilersitsisinnaanissamut tunngavissaqassagaluarpoq.

Ataatsimiititaliaq sulilluaqqunarpoq.